

悔餘庵文集



悔餘庵文藁



同治乙丑仲夏
葉於鴛江歲極

悔餘菴文稿目錄

卷一 賦

李白斗酒詩百篇賦

天孫雲錦賦

君子花賦

擬庾子山小園賦

觀雲悟筆賦

雨洗秋山淨賦

梁夫人桴鼓助戰賦

南霽雲拔刀斷指賦

陶通明移家賦

以魚羨鳥賦

悔餘菴文稿目錄

落花賦

卷二 賦

七夕賦

心虛師竹賦

青賦

簾賦

郝隆曝腹賦


齊姜醉遣晉公子賦

項王垓下聞楚歌賦

月中聽曲賦

老妓賦

憎蠅賦



卷三 序

袁厚安 績懋 同年詩序

李小寶 漢 印譜序

黃仙樵 同年主靜軒文集序

吳鈞甫 秉衡 太守信豐守城記序

馮子良 詢 太守詩存序

左夫人 錫璇 碧梧紅蕉吟館詩稿序

薛慰農 時雨 司馬香草閑情詩序

黃仙樵 秩林 孝廉燕臺吟草序

褚守然 景錫 千戶嘯月軒詩序

同年張仲昇 鍾彥 太守詩集序

卷四 序

梅餘菴文集目錄

江風集自序

寒灰集自序

袁穀廉 年丈邃懷堂詩鈔序

同年郭藕杠 志融 太守詩集序

李梅生 杭 太史小芋香館詩集序

秦氏姑婦詩詞序

焦桐集自序

劍光集自序

真氣文波兩集自序

衲蘇集自序

餘辛集自序

李迂仙獨立樓詩序

卷五 記 引 書

問蓮記

遊青原山記

鴻雪軒記

河口鎮公建育嬰堂引

同年張海門 金罍 太史感興詩引

與袁厚安同年書

復汪芝軒沈子山楊漱雲書

與袁厚安同年書 癸卯年在東河節府

復吳和甫同年書

唁劉詹巖京卿書

復沈墨莊觀察書

悔餘卷文稿目錄

復劉京堂賀生日書

卷六 啟 傳 贊 文 題

都城議建江陰試館醪貲啟

送花糖麻糍與吳清和 嘉淦 前輩啟

送張德甫廉使休致回籍啟

送張椒雲方伯罷職回京啟

為孝烈徵詩文啟

李文恭公家傳

崇祀名宦吳郡張公蒔塘 吉安 像贊

薦蕩女文

焚黃告墓文

祭大鐘文

自題詩冊後
題唐搨武梁祠像

惺齋文稿目錄

四

半畝園
藏書

惺齋文稿目錄

賦

李白斗酒詩百篇賦

以題爲韻

金粟如來青蓮居士酒國醉侯詩城仙史不聞天子之呼慣許
 長安之市而當松漆研螺蘭醪酌兕與高采烈傾殘竹葉之觴
 意到筆隨灑漏桃花之紙此其酒氣拂拂從十指中出者直欲
 吞曹劉而奪蘇李當夫天寶多才長庚下謫既號酒狂兼成詩
 癖異蘇晉之長齋遂知章之短策花奴載以後車草聖推其前
 席續王績醉鄉之記醉亦千秋占陳思才子之名才真一石舉
 杯獨酌細評蟻絲鶯黃振筆疾書笑譜花紅雪白詩襍仙心酒
 逢笑口琥珀盛來珠璣亂走香浮激灩之荷思觸玲瓏之藕添

海餘菴文稿卷一

半敬園藏書

籌倩記笑頰七步始成章擊鉢停催惟願一杯常在手飲須就
 我費少陵三百青錢語必驚人請亞父一雙玉斗且酌蒲萄或
 歌楊柳時畱北海之賓不博西涼之守墨欲舞而筆欲歌杯在
 左而管在右豈獨一觴一詠蘭亭和逸少之篇那能半律半禪
 蓮社禁淵明之酒吸秦關之月滿引再三賦楚澤之雲狂吞八
 九五花何妨嚮馬臣今將復中之雙相最好聽鸚君亦知其趣
 否倡余和汝挹彼注茲杯無餘瀝筆不停披信捶琴之非捷怪
 刻燭之猶遲客來飯顛山頭論心對酒人在糟邱臺畔把臂成
 詩造化皆驚得搔首問天之句風流自賞有舉杯邀月之詞咏
 亭畔之名花宿醒未解舞夢中之彩筆神助無疑九十日之餘
 春一時寫盡三萬場之宿債百計償伊惟其雲漢分章星瓢輸
 液飲興益酣詩情倍劇噉八米之才疎厭三蕉之量窄曾經枕

麴縱六逸之清吟乍可掉船訪四明之狂客解金貂而試換臣
本酒仙走玉管以如飛公真詩伯萬言倚馬何勞唾地者三一
夕騎鯨真欲吸川之百山水清妍花餐月眠酒腸似海詩膽如
天投筆而起長空邈然乃知天有酒星地有酒泉吾何爲俯愧
地而仰愧天清酒爲聖濁酒爲賢吾何不朝希聖而暮希賢招
我酒徒滿坐三千之界笑他詩瘦虛誇百一之篇迄今一卷常
留八仙難遇沈詩采石之江澆酒青山之墓誰復罰依金谷聯
吟桃李之園人醉玉樓寬句靡蕪之路與爾愁消萬古怪哉蟲
可是前生惟公聲振九天希有鳥難爲後賦

天孫雲錦賦以多少工夫織得成爲韻

風排雁箔雨擲龍梭霞綉互捲霧縠斜拖羞垂兮似練匪薄
薄兮如羅燦若華蟲未許量來玉尺豔分天鹿幾經濯向銀河
是誰花樣翻新文章花簇總擬愁絲織就離別愁多繫彼天孫
者引鳳情深牽牛信杳鄰月殿而雲聯住星垣而雲繞錦衾獨
爛鏡其鸞孤錦幕徒張橋空鵲遠支機何處人間之片石曾傳
鳴杼爲誰天上之迴文豈少慧心了了妙手空空雲光染碧雲
影扶紅豈必錦成聯雁奚須錦學翻鴻日月如梭拋去定依玉
戶星辰可緯纈來合付璇宮何人分得天章漫作衣裳之想自
爾幻成秋色都歸組織之工三幅兩幅六銖五銖映日殊麗臨
風欲鋪旣妃青而儷白亦紆紫而縈朱製就雲裳勸駕或貽青
女題殘錦字緘愁欲寄黃姑儘堪章報七襄待呈玉帝恰許聘
償萬貫足替金夫想其扣入絲絲聲傳唧唧錦非色而非空雲
不離而不卽浣從玉露灑開白地光明剪試金風補得青天頃
刻李長吉名高才子諒應叨無縫之衣蘇若蘭巧奪天工庶不
負當窗之織於是結綵樓西曝衣院北文錦之采漸韜貝錦之
華欲匿葡萄錦徒擅其名茱萸錦莫矜其飾倘令風姨展去豈
輸霞帔之光若教月姊衣來應減霓裳之色輕壓凡仙之骨不
勞繡綫縫成巧偷七夕之心或許金梭拾得至若錦囊肩負錦
帶腰縈步雲梯而得意登雲路以蜚聲宮錦誰衣粉署郎原須
列宿采雲曾捧香案吏應是前生成十樣錦之文雖金不換吐
五色雲之氣待玉於成

君子花賦

以蓮花之君子也爲韻

我將遁乎隱逸兮非君子之所賢也我將慕乎富貴兮是君子之所捐也人以品重惟花亦然非淡不豔非清不妍寄種於煙波之國養神於風露之天斯容光之必照兮乃臭味之相憐繁國色之入譜兮匪歐陽而孰爲編也猶晚香之致頌兮匪彭澤而誰與傳也惟君子乃與君子契兮庶幾茂叔之於蓮也彼蓮之清兮以質而華彼蓮之淡兮以正而葩挺修幹之勁直兮謝俗豔之天斜飲湖光而吸露兮離塵垢而餐霞濯漣漪而自貞兮瑩水碧之無瑕飄飄乎有凌雲之氣兮僊僊者其捉月之魂耶夫豈冰夷餌玉湘纍沈沙珠鍊胎而珊瑚骨遂孕結而爲花獨濂溪之一水兮宜君子之所家喻美人於香草兮信騷客之妍詞比善人於嘉樹兮乃左史之媵辭以花爲君子兮其誰

悔餘菴文稿卷一

四

牛畝園藏書

曰不宜斂七孔之心兮抽玲瓏之思羞六郎之面兮抱清淑之姿覽芳徽之宛在兮將溯洄以從之挹太華之雲氣兮蘊太乙之星文媿直於東箭兮擢秀於南薰飲碧筒兮食君子之惠傾翠蓋兮樂君子之羣細中通而外直兮洵含芳而吐芬曳風裳與水佩兮惟其性之潔友江離與湘芷兮惟其德之熏作田田之曲以招我兮和采采之歌而報君胡爲乎蓮之白兮祇結社於高人蓮之青兮獨題襟於居士實相賞之有真乃寡和其若此霽月之襟兮花何修而似之春風之座兮花何幸而擬之非君子不識君子兮誰則愛而君子之矧周子之所直兮有遺賢之在野覩蕭艾之旣升兮念荃蓀之益寡世皆徵遂於富貴兮有樂隱逸而去者慨君子之兩難兮托名葩以舒寫彼爲蓮而爲人兮孰真而孰假使花而解語兮將含笑而曰然也

爾乃壺天可闢笏地初開許淵明之松菊宜仲蔚之蒿萊做雞
窠之闌柵肖蟻穴之樓臺宇雖庫而必爽徑欲往而仍回時則
依雲補樹借雨滋苔紅凝露髓綠坼風胎鶯新得友蜨老無媒
燕雀有落成之賀猿鶴爲賓從之陪將遂盤桓之願方勞締搆
之才誠以湖海無家煙霞有癖占水三分去山一尺儲飼鶴之
餘糧奪藏鳩之半席爛醉和泥奇殭賭石藉草兮爲茵扶花兮
作帑牖納寒青欄榭虛白亞叢竹以鈎衣挂疎藤而礙噴提壺
疑勸酒之歌啄木訝叩門之客是愚叟之新居乃寓公之眞宅
珠葉瓊英交枝蔽明桐高乳滿柳細眉輕松心漸老槐頂初平
膠流柏紫癭裂楓頰陰莖與陽葵並蒔春蘭共秋菊爭榮日過
無影風來有聲非雨疑雨欲晴不晴莫不香隨吸入豔逐跬生

悔餘菴文稿卷一

五

半畝園藏書

望緣鏡幻聽以琴清壓酒支甕藏書鑿楹投壺習射鬪奕安枰
椒辛入飢菜甲宜羹金溫細菌玉版新萌滄將苦茗飯罷香秬
時復提攜藜杖徙倚柴荆青羊訪道黃犢呼耕詩思繞釣鉤乙
乙吟聲答樵斧丁丁水有滄浪之趣鄉殊戶牖之名南鄰北鄰
十步五步靜不驚鷗孤如立鷺從牧子兮閑遨適田更兮歡陪
陌清眈眼之塵橋隔畫眉之渡跨赤鯉以將行聽黃鸝而且住
嵐氣合而爲雲溪光凝而成露其中有抱憤之仙此外卽亡羊
之路因之習嬾成高乘閒入悟躡秦人高蹈之蹤罷楚客遠游
之賦於是庭植三花室熏五木神養芝蟾夢回蕉鹿待燕開簾
祝雞握穀調鸚母以哦詩聘狸奴而護犢籠歸逸少之鶯幕去
長沙之鵬製笥籜之危冠緝芰荷之雅服門無結駟之聲庭豈
懸貍之苔庶二仲以爲鄰倫三高其可逐每當月繞樓行星隨

燈簇四壁蟄寒一鉤編緝陳惠施之五車展黃華之二牘香浮
竹葉之尊光溢桃花之粥閨中鳴軋軋之機窗下課嗚嗚之讀
亦復適意林肩怡適軸不問春秋胡論信宿榮何侈乎玉津
豪不矜夫金谷數有耦而必奇道無往而不復林鳥自辨其苑
枯塞馬安知其禍福方席地而帷天豈縈情於一屋昔丁年而
射策步甲觀而紆紳手讎竹素腰懸艾銀崇賢納履建禮班齒
出蘭臺而典午入藜閣而逢辰侍白虎蒼龍之仗問碧雞金馬
之神謬承行李政告勞薪落秋風之桂子漂春雨之桃人豈意
軸絕維傾金銷石鑠劫陷紅羊人騎黃鶴鹿走歌臺烏棲戎幕
月沈鴉鵲之樓風掃麒麟之閣齧柱折而蓬萊頽駝街沒而荆
棘錯昔之瑣闥丹墀繡櫳珠箔但餘墜瓦之縱橫時見幽燐之
閃爍銜石闕而聲漸繞觚稜而夢落孰不宵驚喚鶴曉愴嗁鴉

悔餘卷文稿卷一

六

半畝園藏書

哀江南其晚矣望斗北而蕭然世豈有延年之鼎與縮地之鞭
河之清而可俟道之遠而能旋怪揚雄之有宅奈宋玉之無田
棋落不平之局酒熏已醉之天枝杪等鷓鴣之借花叢宜蝴蝶
之眠第使寬能容膝高可及肩信大海浮萍之喻畱小山叢桂
之緣非旁風與上雨吾將於是以安焉

觀雲悟筆賦

以夏雲隨風頓悟筆意爲韻

涼風忽來凍雨欲瀉研露禪關看雲精舍非煙而蕭索輪困得氣則縱橫上下有卧虎跳龍之勢纏纏其升爲怒猊渴驥之形匆匆不暇幾訝墨堆鳥篆紙借青天卻如練曳羊裙書臨朱夏而懷素者雀硯乍洗鴨爐始焚學張長史追王右軍將使鐵限踏穿自高聲價綠天展破獨掃塵氛聊當參禪淨几明窗不暑那能快意揮毫落紙如雲且夫滯於機者不知自然之境也局於法者不知自得之師也何以見屋漏痕顏平原使筆臻其妙何以聽江濤漲雷大簡下筆逞其奇悟縱筆於衛娘如舞劍器悟斂筆於褚子如畫沙錐蓋無意處偶爾得此惟有有心人悠然會之所以興酣筆落意到筆隨不見夫雲之出遠岫薄高穹旋起旋落忽西忽東摹急就之新章鈎連不斷補混茫之元氣造

悔餘菴文稿卷一

七

半啟閱藏書

化無功從此縱觀可象形而會意是誰擲筆儼鴈字以書空忽油然作當快哉風其迎風而舞也如筆之輕其乘風而聳也如筆之健其風送之而飛也如放筆而不留其風約之而合也如縮筆而不蔓其因風之去而仍迴也如筆勢之鈎縈其隨風之斜而將整也如筆情之秀曼如有名之碧落神理皆超如初寫之黃庭儀型不遠以知雲影千重無異筆鋒三寸倘學書似此卷舒使握管同其起頓則必波磔能奇鋒芒不露運腕底之全功愜胸中之生趣非蛇紫蚓縮之姿合鳳泊鸞飄之度手揮目送比嵇生之畫尤工志壹神凝惟莊叟之言可喻韋氏五雲之體未許爭奇魯公一筆之書豈容獨步自此法工變草少年銷暑日之長也如笑證拈花大覺啟禪門之悟筆竟如椽雲猶似漆雲隨筆陣以奔馳筆其雲車以迅疾逸情雲上飄飄欲羽化

而仙壯氣雲高拂拂從指中而出狀風雲之變能超妙無雙證
筆墨之前緣聰明第一少年能爾宜贈來李白之詩餘子無奇
盍投盡班超之筆然非冰雪澄心鬼神通思則雲裳自織何關
捉筆之情而筆塚徒添莫極行雲之致乃法由天授演真傳於
草聖草賢斯名若風馳酬重價於一縑一字笑過眼多成幻境
竟分天漢之雲章嘆昂頭自有名師轉勝兵曹之筆意

雨洗秋山淨賦

以泉流石上月照松間爲韻

虹渴猶飲雲癡欲眠珠跳宿溜玉漱飛泉瘦骨嵌石疎髯掠煙
喚雨歸鷗吟秋賸蟬攜屐去也開門見馬憶當爽氣朝撲晴光
晚浮日薄如染霞乾不流風漏一聲月銜半鉤徑葉脫而爭夜
寺花疎而殿秋羞眞面之自秀已賞心之獨幽旣而墊郭秦巾
蠟阮孚展賞雨非春看山竟癖青盤盤而潤泥白齒齒而漱石
蘸古黛之三分瀉驚濤之千尺認離合於羅浮隱神仙於姑射
雨伯盆傾雨工帚掠風姨捧盃皆來雲母搗巾未放白澆百尺
之泉青浣千重之嶂妝淡掃兮眉尖畫新摹兮掌上相邀東壑
之安不速南樓之亮款秋土而有情叩山靈而無恙晴射山頭
涼歸山骨松走輕濤苔磨殘碣烟消守鶴之壇霧闢藏狸之窟
蘭欲秀而香來菌未連而迹沒峯以缺而補霞嵐以虛而待月

梅餘菴文稿卷一

九

半畝園藏書

一抹疎烟半銜斜照楓長瘦而如愁竹低頭而欲笑雲出無心
瀑飛有竅撲翠衣收送青詩釣坐松涼而疾瘳餐之秀而饑療
雨意初靜秋光不濃綠疎薜荔碧削芙蓉風葉初掃霜花未封
翠將滴而襟溼青欲梳而鬢鬆徑三三兮扶菊峯六六兮卧松
攜來酒客雙槎歸去詩僧一筇愛山光之可寫惜山意之猶慵
坐延楓下佳借松間興隨峯遠情與雲閒答吟蛩之斷續伴飛
鶴以往還願得秋風送秋雨年年替我洗青山

風生刁斗雲想衣裳紅妝感敵彤史畱香胡中興於宋室勲內
助於勦王撼山易而撼軍難方面等岳家之重得雄王而得雌
霸同心儷陳寶之祥銜金支翠羽之光莫謂美人傾國壯錦繡
繡旂之色肯容小醜跳梁蓋梁夫人者鳴雞夜最走馬朝但比
肩玉帳分掌銅符胡天胡帝如火如荼後乘引仙乎之節前驅
從伯也之受六朝之金粉無顏高牙坐擁半壁之江山有警纖
手交扶帷壇驚大漢之軍不櫛安能將將板屋賦小戎之什同
裳豈但夫夫方其困兀尤於黃天蕩也餘腥雲蔽樓櫓星陳熊
罷盡怒魚鳥皆臙縹緲閃旌旂之影蹁躑著羅綺之身何期師
旅之交見此黎者竝以止齊之節謀及婦人漫云女子從行鼓
聲不起政使莫邪爲佐劍氣能馴炯照水之丹心操楫異趙津

悔餘卷文稿卷一

十

半畝園藏書

之女攘臨風之皓腕倚旄疑洛浦之神洗兵共挽銀河便欲呼
龍起雨陷敵直摧鐵壘不殊搗麝成塵坎其擊鼓與子同仇不
衰不竭能發能收六韜以鸞鳳爲名久嫺閨閤一鼓而貌貅作
氣其整戈矛機鈴洩元女之傳擒來赤手號令比飛奴之捷笑
起蒼頭有不共戴天之憤有不甘割地之羞所由怒激三搗直
等禰生之奮杖夫豈戎興一笑漫同卻子之援桴欲張吾軍必
滅此虜齊五伐而效三驅轉四輪而翔八檣指山半僊僊倩影
宛排十二金釵聽江中浩浩軍聲同射三千鍊弩想通靈於楚
澤擊起馮夷疑習戰於吳宮教成孫武控罷虎而都臺赴節但
看萬鷁如飛扼鯨鯢而鬱律宣威不信雙蛾能嫵一震破蚩尤
之霧直下雷車九霄猜織女之星遙臨河鼓羽葆飛揚鱗堂軒
蒼拳空之雌霓生芒薦食之長蛇失據手揮雨點濤轟迴胥母

之狂膽落風聲颺舉借封姨之助始識靈鼉警眾極使船如馬
之能豈知老鶴潛通竟化鳥爲鳧而去恨未黃龍直搗地輿從
此全收縱教白鷺橫飛天塹那容偷覷詫荆布揚威閩外人
懾動地之聲効藁砧待罪行間玉汝列驚天之疏吁嗟乎國有
人邦之媛叶珩瑋精組練手一麾心百鍊固宜倚若長城封之
大縣伉儷旌忠神仙健羨漢飛將虎頭燕頤儘誇將夫婿奇姿
衛碩人螭首蛾眉誰識是英雄真面倘畫像麒麟閣上定應多
買臙脂卽提兵驚鶴營中不啻輕拈鍼綫何事六橋花柳湖山
賡偕隱之詩至今兩岸菰蒲風雨效當年之戰客有嘆逝水於
東流話劫灰於南渡想夫翩若驚鴻出如脫兔大小喬無此施
爲左右甄聽其調度有聲有色指揮落天女之花其事其人美
豔奪將軍之樹相當浮白深杯談夢虎因緣合付汗青煒管記

悔餘菴文稿卷一

十一

半畝園
藏書

從龍遭遇孰意傾城之哲足以成城願移作賦之才爲之治賦

南霽雲拔刀斷指賦

以一座大鷲爲雲並下爲譜

南將軍霽雲者睢陽之大將也勇烈無倫忠誠鮮匹蹈刃猶甘捐軀奚恤欲建中興事業奈孤掌之難鳴乃求犄角聲援遂子身而獨出不辭頓地者三將借背城之一方其乞援於賀蘭也寇至益多兵交屢挫民疲不攜食盡而餓當強敵者半年守孤城之一座江淮猶未失太上皇何日能歸徐毫不相援尹子奇幾時得破欲乞臨淮一旅之師以爲張許三公之佐於是慷慨而前聲情如繪謂城方危甚倒懸食已絕夫粗糲而大夫糧猶山積士飽馬肥刃若霜含矛長戟大幸臂指之能聯庶肘掖之無害乃進則第陳靡靡之音猶卧悠悠之施方謂風霜辛苦請君暫釋戎裝絲竹豪曹與子且終嘉會雲乃撫膺默念扼腕潛驚彼有心於畱客更無意於興兵滿腔義膽忠肝向誰苦訴一

梅餘菴文稿卷一

上

半畝園藏書

路劔炊矛淅竟是徒行怒髮鬢衝不禁英雄之淚握拳爪透曷勝激越之情不可陳以禍福或能感以精誠遂慨慷而語曰今外增悍寇之圍內鮮羸兵之食搜糧則鼠雀皆窮待救則鸛鷺不至拔刀起助仁人想有同情染指何心壯士胡能獨醉倘同仇之義不明將宴客之筵誰爲何面目更相見也要知脣齒之皆寒好頸項誰當砍之早決頭顱之如寄急已甚於然眉憤更深於斷臂請畱一指以明誠不待三年而拜賜掣身遽起逆耳無聞眦怒張而欲裂心奮激以如焚出秋水於腰間肩真倒挽度寒風於掌上指竟中分骨斷蹲鴟虹白吐雁翎之氣血流鉤戟猩紅凝虎掌之紋從目則四筵皆震掉頭而一去如雲壯哉此漢魏彼將軍藉作不平之鳴誰救焚如之急料志業之難成惜鄰援之不集男兒死耳塔間之箭空畱賓客淒然座上之襟

盡淫恨未椎搗力士徑奪晉鄙之軍枉教首頓包胥空效秦庭
之泣客有讀吏部之文章想英風之叱咤支半壁之山河實雙
忠之匹亞看此獐像鎔頑鐵膝終屈於階前憶當年心比堅金
指空斷於帳下覩如生之廟貌常留一代之名誅既死之奸庸
合受千秋之罵

梅餘卷文稿卷一

三

半畝園
藏書

陶通明移家賦

以題爲韻

客有遊句曲山者蠟阮孚屐揮郭璞毫健支藜杖香挈松醪將聽元靈之曲尋善勝之刀望紫氣之浮霄佳哉鬱鬱踏綠陰之滿徑樂也陶陶自知仙境難逢竟有卜居之想倘令山靈許買何嫌索價之高或告客曰此則陶隱居最初之故宅爲仙家第八之洞宮而茲山勝境猶未窮也當其披荆棘翦蒿蓬量十笏展一弓訪三茅之仙跡振五柳之家風聊以息肩家在煙霞深處如何洗眼人來雲水光中笑人間選佛之場此後無心更入問世外梯仙之國何時有路能通乃目者囊琴攜客瓢酒呼僮探幽選勝游於積金峯之東先生則悠然望巽然驚環顧而笑曰是非上仙之紫府而下界之赤城乎君不見洞如月偃徑與雲平流霞石暈飛雪泉聲隔奕紅而斷絕列峭碧以分明煉九

梅餘菴文稿卷一

古

半畝園藏書

轉之丹却宜支鼎築三層之閣正好吹笙溪山自有主人與我輩特畱佳境天地原爲逆旅得此間足寄浮生待從樹隙花梢結成茅舍何啻飈車羽駕飛到蓬瀛由是卜日經始移家就之則見香爐互擁經卷交持攜將壽客導以僉兒如蕭史之登臺鳳鸞並駕似劉安之拔宅雞犬皆隨芒鞋竹杖而前輕齋鶴料茶竈筆牀之外重載鳴夷明露一囊弟子束修之具清風兩袖賓朋入賀之儀獨安東澗之居鄰真難買不受北山之笑文更誰移竹扶闌檻蕉補窗紗月尋坐榻雲護飛車習依人之猿鳥靖走陸之龍蛇十畝耕煙門外種來芝草一樓聽雨簾前吹落松花漫誇家有賜書不換幾篇真訣莫笑家無擔石尚畱滿斛神砂從松子游引畱侯爲同調撰桐君錄嗣岐伯以名家風高神武之門快當日掉頭歸也月照華陽之路望故居回首非耶

人如威鳳祥麟牢籠不得名在丹臺絳闕聊舉非遐向使盧僅
容蝸班猶序鶯徒謀泉石之貴未暢煙波之趣仰青雲觀白日
咫尺仍遙揖金母拜木公神仙難遇惟宰相有山中之號桂樹
留人先生恣方外之游桃花迷路試問真靈位業都水監品秩
原高卽看洞府規模名山藏莊嚴如故在此山之最勝者客豈
無意於一顧乎於是望遠如疑登高欲賦扶篠先登捫蘿爭赴
更游於積金峯之東穿白雲而徐步

悔餘菴文稿卷一

五

半畝園
藏書

以魚羨鳥賦 以題爲韻

且夫養生之有術也知其雄守其雌造物之無私也予其角奪其齒飛自飛而潛自潛我爲我而爾爲爾不相入者鑿枘或方或圓未能化者吟哇乃疆乃以相彼鳥矣豈思澤國之遊吾其魚乎曷慕山梁之止惟魚也雙鬢潑刺而鳥也六翮舒徐惟魚也千頭聚戲而鳥也一蹴凌虛鳥則竹箭飛來巧避北山之弋魚則桃花漲起潛驚西塞之漁雖升沉之異致實秉畀於生初好音時送懸蠻可以人而如鳥樂意偶參濠濮豈其我不知魚爲思魚躍於淵何羨乎蛇之化雉方幸魚潛於渚何羨乎鼠之爲鴛然而習幻者忘真狃常者思變有就新去故之謀存舍已從人之見若謂江湖大矣何如廣莫之寬游泳悠然未得扶搖之便波臣有意將隨遵渚之鴻飛水族何知欲趁凌霄之鸚薦

梅餘菴文稿卷一

十六

半畝園藏書

倘營巢之可借更誰緣水而求將結網之徒勞早免臨淵而羨生當雄飛不當雌伏終難化乎癡心志在流水忽在高山若頓忘其眞面蓋由外慕滋紛內觀未了冀雲路之翩翩厭風波之浩淼豈鱗蟲之屬不及羽蟲或白小之名未如黃小鱧比目而鷄比翼總之嘉耦無猜鷗鷺雀而獺毆魚誰則安居不擾况復鱣原似鵲能禦火以飛翔抑聞鯤亦爲鵬更搏風而天矯變蛤而雀皆入水鳥或依魚成龍則鯉且升天魚何慕鳥莊叟莞爾而笑曰是未知飛躍之殊能而淵霄之異路也入想非想之天處材不材之數形而上形而下豈象罔之能更有所短有所長皆鴻均之是賦亦猶丙穴難同鳥鼠之羣何若丁盤漫作魚熊之慕應悔我忘故我致令覆下之鹿迷定教吾見眞吾勿使夢中之蝶誤

落花賦

以花落家僮未掃爲韻

匆匆春事草草生涯樓臺漠漠風雨沙沙墜如瓊之香雪散似
綺之流霞忽驚寶勒香車游冶之期易過任爾繡屏錦幃春歸
之路難遮最好鋪來樹下初齊之草應教愁煞枝間未謝之花
想夫金粉六朝綺羅三閣開絢爛之園亭繞瓏玲之簾幕釵頭
旖旎玉纖纖頻把雲扶旖角招搖石醋醋也驚風作空對一尊
之綠坐嘆行愁總無十日之紅早開先落時則晴熏麝鼎午靜
蜂衙銜來紫燕送去青鶻折贈有情蓄意莫歌金縷曲返生無
術尋芳休到玉鉤斜訝墜地之綠珠香消此處擬成煙之紫玉
影落誰家則有軸簾喚婢縛箒呼僮溼脂痕於井畔瀉粉水於
溝中誰知活色生香都成朝露可奈殘紅碎紫欲罵東風憐蹤
跡之飄零似儂薄命笑繁華之妝點如此收功至若旅館無眠

梅餘菴文稿卷一

七

半畝園藏書

征衫初衣鷓鴣至而風淒鷓鴣鳴而雨沸莊生化蝶夢回色界
之天蜀道嘯鵑腸斷錦城之尉畱妝學舞伴小宋於吟初結子
成陰問司勳其來未君不見紅瘦綠肥鶯愁燕惱花欲落兮誰
能畱花乍落兮不勝掃信有土之皆香更無人之不老卻怪化
工多事廿四番風信安排重令客况無聊三萬日酒懷顛倒

賦

七夕賦

萬劫相思萬種愁碧霄無地可埋憂錦機字密緘情寄銀漢聲
長帶淚流自古因緣天不管天孫猶是嫁牽牛七襄勞刺刺一
水隔盈盈夜夜關山怨年年機杼聲責索聘錢天已吝謫居營
室事難明安知馬邑龍堆意卽是青天碧海情烏鵲填橋傳七
夕蜘蛛網榼卜三更試看玉宇高寒處誰見珠旰宛轉行匏瓜
長繫丁香結佳期盼到翻淒絕愁人不解歡巧婦奚如拙終年
無限情一夕何勝說天雞著意鳴又恐輕離別神仙如此別離
多不識人間又若何深宮惆悵霓裳曲永巷淒涼紈扇歌破鏡

悔餘菴文稿卷二

半畝園藏書

安險眉未展寒衣添綫手頻搓那堪靈匹雙暉照獨倚欄杆看
渡河響屨回旋小閣東星輿指點在雲中錦席初張風颯颯玉
繩斜界月濛濛紅袖深深拜青詞宛宛通慧心無處託私語有
人同深情定覺故人新別恨怕從來路去巧心未許擲金梭愁
睫祇應垂玉筋六銖衣薄夜初涼七孔鍼明天欲曙果然一刻
抵千金政恐千金無買處爰歌曰不願長相見只願長相思相
見只如此相思無已時此時此意何人解不是嫦娥誰得知何
年會始何年止我欲乘槎一問之

心虛師竹賦

以竹本虛心是我師爲韻

清節爲秋虛懷若谷有客擔簦其中架屋悠然如在瀟湘瞻彼
實同淇澳曾經待價競稱大夏之筍久已上鄰謹事淵明之菊
堅多心亦堅多節精神更爽於朋松作之君遂作之師名分獨
尊天帝竹且以竹之受種崑岡託根上苑玉潤碧鮮煙清月婉
豈雪壓而須扶任風欺而不偃雖抱圓通之性節概原高不加
磨琢之功風神自遠成蹊而至猶桃李之無言得氣之清如松
柏之有木其質則勁其心則虛近之非落落者叩之乃空空如
施美蔭以庇人宛若緇壇之杏簡良材而成器匪同青社之樗
曾有彈章數甘蕉之蒙蔽自然直節笑短荻之粗疎比藕玲瓏
才子效靈於七孔如蘭蘊藉美人見喻於三閭第觀其檀欒佳
影騷屑清音旣周遭於芝室復掩映於苔岑王子猷灑掃庭除

悔餘卷之稿卷一

一

半畝園藏書

快覲綠艸之面文與可摩挲絹素欲傳青士之心別有知音仰
屋識郵亭之笛何勞遠訪刺舟聽海壘之琴歸而求之恍渭川
之坐對擇其善者從嶰谷以追尋請益則起香山居士苑爾名
師昂哉小子顧我輩之所期與此君而相似風來瀟灑竅笑龍
鍾日問平安奚煩鶴使後庭列侍得非綠萼仙乎先路招安惟
有赤松子耳教或通於梓俯禮亦宜然理可悟於樾香吾無隱
爾訊溪邊之六逸趨承亦復奚爲想林下之七賢膺服未曾有
是得不心獻葵傾心舒蕉裏開心塞於蓬科引心香於蓮朵映
冰壺而宛在對影相宜尋玉版以皈依參禪亦可偶來立雪樓
中聽夜雪之聲敢拜下風牆內列春風之座匪獨師推一字傳
个字而爲誰恍同師擇三人索解人而有我於是不驕植德自
牧修儀吉祥止室憫瑟登詩旣以同風見義亦因覆露稱慈到

處追陪得數竿而足矣此中空洞容百輩而能之附雲路以千秋從此馳名於東箭結歲寒爲三友更將託契於南枝分行待鸞鳳之棲許座中之佳士屈節致草蒲之拜信天下之良師

悔餘菴文稿卷二

三

半畝園藏書

青賦

以東方之色也爲韻

氣鍾泰岱德毓儲宮五行在木萬物爲銅出於藍則師將謝弟
紆以紫則卿或慙公面繡生花若獸非獸嘔絲食葉惟蟲能蟲
煙雨平疇扶犁叱犢風沙絕傲縱調驄曲終餘江上之峯何
人鼓瑟春入秀河干之草有客推篷鴛鴦避網而飛北山之北
鵬鷗掣絛而逝東海之東爾乃城開懸閨壤異徐揚董能收露
女亦司霜養十分之爐火舒一色之帷裳簪萋衣呼龍耕石
蒲團竹策待燕歸梁潤丐金膏鬢晶晶而鑑影名書琳札眸炯
炯而含光霞泛瑤觴一升酒醞成桃核月流瑣闥九華燈映徹
芝房跨老子之牛神游西國化巨靈之雀氣懾東方杖拄藜枝
照字吐口中之火黏和漆葉延年探肘後之囊又若結廬蛤縣
納履螭屨送詩排闥沽酒指旗丹不渝而晝久黃相錯而文奇

悔餘菴文稿卷一

四

半畝園
藏書

鐵硯纂縹緗之業巾箱練黼黻之儀梯登天其非遠芥拾地以
何疑鏤管朝題補桐君之舊錄瑤琴夜撫按梅子之新詞裙屐
聯翩去鳥銜中之路樓臺幽寂來禽寫帖之時故侯小隱於東
門離離瓜熟名族別居於西巷裊裊楊垂比學士於銅錢此其
選也念美人於玉案何以報之酌兕論交疏密異步兵之眼研
螺助嫵淺深宜京兆之眉至於萱可忘憂麻能扶直楓癭通神
槐安闢國猿嘯彌幽蠅營已惑烏何事而名經驟何爲而伏軾
抱冰取清綺簞招涼導米求精紗廚供食在人爲倩衣楚楚以
相宜得水能清泥盤盤而可測雄黃化汞轉卽成丹妃白裁聯
守原近墨塞外指王嬙之塚叢長蘅蕪溪邊尋蔣妹之祠蔓生
荆棘凌雪蓋疎藤蘿直上之姿洒雨皮皴松栢後凋之色各有
筠筒頰披苔箋自寫步障初張坐氈不捨歌叶鷓鴣舞諧駿馬

研麟髓於匳中埋晴晴於戶下蘭陵美酒飲到齊州藥市新鞵
踏開平野官私蛙唱披莎徑以臨池子母蚨飛音浮榆錢而作社
軍中拜狄朱幕油湔曲裏師秦白衫淚灑指尖葱削擘絲縷以
成章舌本蓮生吐琅玕而盈把一夕柴蜜雨過蒼蒼者其正色
耶千秋芸史風清落落然我丈夫也

悔餘叢稿卷二

五

半畝園
藏書

簾賦 以影穿夜月響度春風爲韻

寶鴨灰沉煙篆冷碧闌干外東風靜一庭香霧不分明湘紋紅
隔花枝影綺籠斜颺玉檻低連宜晴宜雨非霧非煙束鸞鉤兮
半捲招燕翦兮雙穿只愁相望難相見萬里雲山咫尺天簾捲
兮花開簾垂兮花謝密罨雨兮迷晨疎漏風兮怯夜紅淚猶留
楚竹斑綠陰恰替芭蕉借萬縷千絲巧織成多情難補相思罅
爾其繡戶雕籠丹楹絳闕窮窈窕初搗玲瓏未揭小觸斜勾燕尾
釵低垂淺露鴉頭戰夜深休遣玉鉤鉤怕見團圞天半月豈無
織竹當門緯蕭作幌寒燈漏紙閣之光妙卜逗金錢之響輕隨
螢火穿疎待蛛絲網三竿槐日黃篔一縷茶煙綠上圍棋聽落
子之聲讀易起離塵之想至如珠顆勻編翠旌低護風扶南苑
之晴雨捲西山之暮疑鬢影之如雲惜眉痕之不落紅情勾入

悔餘庵文稿卷二

六

半畝園
藏書

庭花碧色迎將宮樹尙向移春檻外垂春光歸去應無路更有
鱗毛緝豔蛟睫緝絳珍鞠衣引對蓮幕留賓似屏風之隔坐如方
麴之祛塵注銀蟾而瞪目礙粉蝶而迴身紅葉乾疑雨黃花瘦
比人寒勒圍爐之夜香偷撥甕之春非特吹來瑟瑟喚出眞眞
畫輝鳳羽波皺魚鱗而已歌曰蝦鬚十幅畫堂中銀蒜光搖淡
蕩風鸚鵡一聲傳客到瓊鉤齊落玉丁東

郝隆曝腹賦

以向日仰卧曝腹中書爲韻

郝佐治寢饋陳編砒鉞俗尚南阮清貧東方跌宕不因人熱之
懷不合時宜之狀更無長物獨兼二酉之藏聊以解嘲偶示三
壬之相噩夢定噉丁固詎羨松生清光暫之義和儼同葵向時
則星欲迎雙月剛屆七列家珍其恥谷虛諧俗例爰陳庭實或
曝從露并紅纒縮衣或曝向風檐青翻縹帙或曝經臺上雲衲
鋪來或曬網門前煙蓑捧出問爾傳豕何有雞窗牛樹之風笑
他免俗未能犢袴一竿之日別有會心忽焉撫掌快展桃笙嬾
移竹棍掃檻外之蝸涎拂簾前之蛛網八磚影麗音紋侵枕簟
之痕一斛才多花繡簇文章之樣莫訝溫披黃襖頭腦冬烘自
甘冷抱青氈鬚眉秋爽襟開盡走填胸皆不朽之奇輪轉焉飛
昂首任彌高之仰然非經笥能容書囊自課金絲叶其吟哦珠

悔鷲菴文稿卷一

七

半畝園
藏書

玉供其咳唾神仙有字盡充脈望之餐孤陋無朋虛設泉比之
座徒使鄴侯架上三萬軸觸手如新翻疑杜老詩中五千卷撐
腸欲破將腹真負負聲驚党尉之呼且腹未便便嘲起邊生之
問則此之息影空庭延暉暘谷宛啜沒字之碑空誦藏經之籙
腹難副是幾曾借以一鴟腹縱瞞其只合封之三鹿匪直拋書
攤飯汗滋白醉之顏正猶捫籥扣槃識障青盲之目向日真成
熱客將毋晒等趨炎間風欲問寒儒何至愚如獻曝夫惟珠已
盈船玉皆溫積史可名心譜原號肉魚噴墨而嬉晴麝抱香而
就燠絕愛金精一點鑄成秋橘之黃待看墨汁三升唾作春麩
之綠詎意胸中磊塊無非炳蔚其文那能皮裏陽秋亦可摩挲
而讀自爾高羅星宿直欲騰北斗之光卽今雅擅風流何必坦
東牀之腹奇才吐鳳壯采噓虹牙籤祕錄眼纈迷紅抱戴并爲

人瑞襟題信乃文雄與日皆華我輩詩書之氣非星亦巧予懷
杼軸之工包四部於曹倉探喉語雋儷一規於秦鏡照膽光融
足知毫髮無私杲杲者照臨於上不啻肺肝已見秩秩然編次
其中然而清談比比蠻語徐徐禍且縣於六代學誰績以三餘
目識一丁便據文壇之列胸藏萬甲孰探武庫之儲幸此生骨
相非寒作名下無虛之士知爾後腰圍難減貶人間有用之書

悔餘菴文稿卷二

半放園
藏書

齊姜醉遣晉公子賦

以題爲韻

新人燕笑故國烏嗁心寒金玦夢熟璇閨繫閒情於風月鬱壯志於雲霓政宜自建鴻圖早夷吾而返晉未許常諧鳳卜隨敬仲以畱齊蛾眉具有雄心真不媿桓公之女駿骨竟逢巨眼且無論嬴氏之妻方晉公子重耳之出口也馳驅兩雪閱歷星霜莫滌薰蕕之臭轉穠桃李之香訂來離別之詞白首曾盟季隗註到因緣之簿紅絲又繫齊姜爲思贈馬情高匹妃敢云非偶尙念攘瑜恨切溫柔何可爲鄉奈繞樹以無依羈鳥聊從塞雁詎析薪而不克食魚竟得河魴於是巢穩鳩營瑄諧鳳吹比蛩駟之相依遂嬰蜺之久寄卻借杯交鸚鵡慰去家去國之思從教佩戢鴛鴦極憐我憐卿之意飽看於菱花影裏真誇秀色可餐酣眠於萱草香中溥忘憂心如醉公子翩翩絕世未免有

梅餘菴文稿卷二

九

牛飲閣藏書

情少年而碌碌因人安能成事幸哉前箸工謀後車交勉嗟予尾之脩脩篤匪躬之蹇蹇將以蘇煬毒於宴安將以柅燕私於婉變豔婦每能傾國驪姬誠後事之師哲夫自足成城狐舅實從公之選惟是諸君子者籍林下以叢談孰知有婦人焉鬢髮間而倦眄不謂蠶姑言泄手刃潛加轉令騶從謀成腸輪頓遣誠以姜之慧性珠圓淵思玉鎮銀手斷而無疑金口緘而尤慎式微憂甚於歌黎庶冀深於筮晉想從土雲龍風虎安能墨墨爲懷慨寓公春燕秋鴻不覺蒼蒼在鬢未肯香衾孤負萍露迺征且看翠袖殷勤流霞競進願一盃之更盡開筵敢訴離襟已百兩之潛裝把盞莫辭餘酌天涯草綠人面花紅怕春光之漏洩戒秋駕之朦朧弄機關於掌上澆磊塊於胸中願金屋以貯之對傾綠蟻儼玉山其頽也扶上青驄幾度纏綿正天桃之

灼灼者番惆悵又行李之匆匆從今兩地相思難免情長兒女
可奈一身未了不堪氣短英雄千里萬里酒人行矣蟻夢方酣
驪歌已起揮戈之怒何爲沈璧之盟可已糟臺罷築婿鄉非投
老之鄉畫楫橫飛帶水是銷魂之水倘使令收逐客百年好合
齊眉安能業著尊王五霸聲威震耳始識帷房之內無大丈夫
從知巾幗之中有奇女子奈之何燕燕多愁鶉鷄虛慕非白雲
遠間金華豈黃土長埋玉樹未合房中之樂錦瑟分張徒畱磔
上之痕金疊枉賦嘆嘉耦翻成怨耦可堪鏡對孤鸞悔有情莫
若無情空爲窟謀狡兔是以介推負母共戚者不必同休何如
趙季迎妻憐新者未嘗忘故也

悔餘菴文稿卷二

十

半畝園
藏書

項王垓下聞楚歌賦

以是何楚人之多也爲韻

頭募生王心攜死士劍氣如生鼓聲已死驚霸業之全灰條悲
歌之颯起重圍唱合倒戈絕望於刀頭四顧憂來警枕獨愁於
里耳壯歲學萬人之敵庸有濟乎中原收百戰之功而今去矣
一霎風號虎帳酒醒時世都非千秋波咽烏江浪淘盡英雄
如是當項王之阿房縱炬函谷衝戈大王風布壯士星羅惟猶
豫而莫知所主亦狼貪而逞恤其他竦諸侯壁上之觀臂使八
千子弟背義帝關中之約手提百二山河鬪智絀而鬪力羸善
戰終嬰天忌私仇多而私恩少分疆尤齷人和封三縣於南皮
突見異軍起趙畔九江於北面驚聞使迎何蓋其上游迫故
主之終善地濫諸臣之與印刖則麾下情漓決舉則席間謀沮
田榮發難以連衡彭越貪封而反距脣齒寒而螳欲吞蟬爪牙

悔鷲雀支稿卷一

十一

牛歌園藏書

落而虎將變鼠范亞父怒撞玉斗投暗珠湮漢高皇祥冶金刀
摩天刃巨矧復登壇大將相當驚旗鼓之來何期仗劍亡人反
間恣金錢之子悔未手鏃項伯竟完功狗於典劉祇應舌爛韓
生猶笑沐猴於僞楚方其受垓下之圍也雲屯壁壘星厄鉤陳
正敵氛之旁午忽宵籟之酸辛抗鄉音其互遞挫霸氣以難伸
宛然下里之吟觸聽而此隨彼唱直是原田之誦反顏而舍舊
謀新帳中鷹嗜嘍之聲獨嘆逝騅不利覆下破倉皇之夢始知
得鹿非眞諸王之印豈能銷前箸先輸漢策降卒之阮猶未馮
後車已續秦輪長離曲且和虞兮我憐卿卿當憐我變徵聲都
成楚些人負汝汝亦負人明月欲黯雄風忽雌悵南音之不競
慨東首之無期豈乞食朝雲歌散思歸之士豈升陴越石歌迴
索關之師過雲而志鬱飛揚愴甚胡笳之拍晞露而情傷契關

颯如虞殞之詞天將扶火德而王胡不預銷劔戟地則據咸陽
爲勝奈何自撤籬籬從茲衣錦書行富貴故鄉何在不識潢圍
宵遁君王末路安之誠以楚歌之聞也驚疑唳鶴僂襍吹螺千
百人如謳郢市一再行如奏陽阿嫋嫋其音兼楚咻之紛沓行
行且止和楚舞之婆娑顧此頭顱盡今夕一杯之酒將何面目
見來時千頃之波豈期相偉重瞳壽考異蒼梧之符不分兵譁
十面蒼涼同黃竹之歌鄉心落亭長船中忽春漲軍聲之竝息
戰血灑老君巖下想秋燐鬼唱之猶多迄今廟貌荒寒英姿瀟
灑高臺悵宋主之登殘碣桐魯公之寫泣窮途於杜默淚流冥
漠之中褒特筆於史遷名列諦煌之下婦人仁而匹夫勇夙疑
此論非公敵國破而謀臣亡堪笑何王不假善將兵善將將蒙
有猜焉不學劔不學書公眞健者走馬定兩軍成敗天實爲之

悔餘菴文稿卷二

七

牛畝園
藏書

斬蛇爭一代江山今安在也

月中聽曲賦

以唐明皇中秋夜游月宮爲韻

神仙游戲世界清涼鏡中人影衣上天香風引盧敖之步雲尋
侯武之鄉輕擲秋毫宛騰身而起起奇穿月脇條盈耳以洋洋
石傳玉宇瓊樓斷終古往還之路何意龍麟鶴駕闢鈞天歌舞
之場誰知三尺孤筇曲曲潛通上界祇覺九重宮筮垂垂近接
中唐當開元之鼎盛幾貞觀之升平乃倦勤於耄及始佚志於
紛營傾國擊蛾眉之嫵游仙羨鶴背之輕但後宮寵愛之容素
娥欲鬪更前席鬼神之問方士爭迎叩縮地法誦昇天行躡影
超塵之想談空說有之情會聞丹闕朝回當日夢聽廣樂漫詠
綠章夜奏何人身到通明月色如霜璇宮夜長千秋佳節萬里
清光遙指山河之影欲捫星斗之芒歷歷白榆貫月查曾干帝
女團團丹桂修月斧久謫仙郎懸知倚樹無眠絕少塵凡之夢

梅龔箋稿卷一

十三

半畝園藏書

恰想散花有伴應殊時世之妝奈纖阿之終阻徒明眎之相望
除非竊藥蟾蜍絳闕長依羿后安得填橋烏鵲銀河不假餘皇
渺無階級漫欲飛紳介以丹客賓於碧翁禦寇從而下上望舒
御以西東只虹橋占斷秋光便許取回月子况羯鼓打開春色
本來喚作天公今夕何夕太空非空紛拏雲白碎蹴霞紅絕跡
飛行不待緱山之鶴清歌妙曼忽驚洛水之鴻果然珠玉隨風
唾咳九天之上始覺衣裳如雪莊嚴七寶之中一塵不起萬象
皆幽魚龍色幻鸞鳳聲柔和鏘鳴於玉杵溢光采於晶毬窠繡
裁衣幾費天孫之錦隔屏記曲定添王母之籌丁冬襍環珮之
聲晶晶之銀雲盡遏塵濁洗箏琶之耳纍纍之珠露交流嬋娟
不隔紅牆頗怪仙人多事游衍直窮紫府足知天子無愁是誰
雖覓吟成宮商可譜只恐罡風吹斷天地皆秋夫豈無別館離

宮歌房舞榭絳樹清妍翠華豫暇周王瑤圃八駿揚鑣夏后璇
臺二龍捧駕胡爲乎交手神行希心羽化五色訪媧皇之石靈
跡堪摩六飛臨兜率之宮歡聲如迓剛訝琉璃踏碎玉屑橫飛
孰令絃管吹開金波倒瀉或意朝天羣帝方攜玉女以行秋翻
疑列宿郎宮不著金吾而禁夜以彼教坊技熟樂府才優進點
於宜春之院觀酺於勤政之樓二十五郎吹管逐念奴繡口三
百萬貫奉錢費秦國纏頭金粟仙心十什譜成行樂玉環妍手
四弦彈到忘憂千艘翻得休之詞聲殷渭水兩部進太平之曲
舞按涼州漫誇絕妙梨園子弟極人間之選爭及清虛桂府君
王恣方外之遊珠斗闌干瑤波滑笏曙色將開高吟漸歇聽風
聽水清餘嫋嫋之音疑雪疑冰寒透珊瑚之骨斯游誰記應呼
闕澤之名此曲頻聞翻羨吳剛之罰任爾指尖割譜不愁天籟

悔舊卷文稿卷一

古

半畝園
藏書

無傳祇今眉樣畱圖可惜宵光易闕擲金錢而印跡驚開擁足
之雲撼玉笛以偷聲吹小當頭之月由是按八音之高下圖三
疊之初終題紫雲以爲號較白雪而尤工喝月月行馭氣獨參
道祕歌風風應番音夙負宸聰從茲記得大羅壓倒金絲之奏
豈但唱來小海驚回珠翠之叢故應興慶池頭龍神再拜可許
廣寒闕下鸞使頻通最宜殿閣涼生長逢蜺斗莫遣江山舞破
始下驪宮

老妓賦

以暮去朝來顏色故爲韻

鶻鳩爭鳴鴛鴦驚寤梗斷嗟風蘭幽哢露依依金縷之歌切切
冰弦之訴名班翹楚曾誇冶態驚鴻色賭施嬌可惜流光馳騫
從此紫雲誰乞難爭桃李之妍由來白日無情易過桑榆之暮
燠少寒多愁來歡去門巷當年笙歌何處凋零雨後之花飄泊
風中之絮待綠珠之重價安知物色終乖倚碧玉之韶齡豈分
年華莫據指鏡而時妝欲鬪羞面目以都非塞裳而故步難嫻
損腰肢其何遽猶憶臺盤永晝燈火通宵門填寶馬坐擁金貂
羣呼婀娜競唱妖嬈識曲擲纏頭之錦記盟瑄鬢臂之納斯時
也身材芍藥口氣芳椒額黃新約眉綠勻描一笑一鬢爭何嘗
蒲之面三眠三起難扶楊柳之腰竟無靈藥堪偷駐顏遲暮卻
比香桃尤瘦支病終朝絮館花臺強起徘徊鷓鴣互喚蛟蜺相

悔餘庵文集卷二

十五

牛畝園
藏書

假峰狂如醉鷗狎無猜問海棠其誰聘笑豆蔻其何胎自憐婪
尾春光荼蘼風捷更似斷腸秋色齒蒼霜摧難從鴛籠書生幻
成玉耦那及鳳窠羣女蚤得珠媒椒有餘辛尚作尹邢之妬桃
雖結子仍望劉阮之來又見彈棋局冷響屣廊閒惱銅壺之漏
永怨玉白之緣慳牛渚星娥屢駕蟾宮月姊難關徒復穴竝頭
之錦枕巖屈膝之金環瓊簫何許傳聲劇羨鳳皇臺上銀燭依
然伴影遠輸燕子樓間三更聽雨之心如鹵巴蕉捲綠一掬臨
風之淚爲誰湘竹畱斑倘令杜牧重逢分明如夢就使周郎再
顧宛轉何顏豈無赤鳳能來黃鸞相識尚書半臂爭投丞相六
鬟竝飾歸柳氏於章臺封李娃於汧國何茵溷之終殊竟藁砧
之難得猶恃賓筵見慣兩頭之簫管逢迎孰憐官舫呼來半面
之琵琶掩抑翻笑箔蠶成繭絲有幾而纏綿生憎庭鶻爭巢語

無端而啁唧舊跡易迷鴻爪夢來爲相見之期新妝多買燕支
畫出盡可憐之色客有耳熱勾鬪齒寒紈綺或催細馬之馱或
挽游驄之駐絲欲斷而還連衣經新而旋故占繡鞋之脫卻空
憑鸚鵡傳言博金屋之藏來又乞鶻鷓療妬更悔開將後閣有
情莫若無情倘知鑿及前車一誤何爲再誤任我輩不衫不履
聽黎園合唱之詩願此身爲佩爲釵續栗里閒情之賦

悔餘菴文稿卷二

六

半畝園
藏書

嘗讀歐陽子憎蒼蠅賦謂其無害人之具幸不爲人之畏胡不爲人之喜意若甚憐之者嘻其左矣從來羣小之生必挾陰賊之氣使其可喜害將甚於可憎况乎竊人之脂膏玷物之本質雖不害人陰賊已甚所以不爲人害者有制之者也使假之以蜂蠆之毒尾與蠱蠱之利齧其害人庸有豸乎又豈止於可憎而已乎爰廣其意而爲之賦

趨炎之徒逐臭之夫殘魂不散結習難瘳孽風吹之蠢焉而蘇生八九子化千億軀方頭比蠟圓腹疑蛛口如嚼墨頂或塗朱仰棲俯食後擁前呼公爲朋黨私實穿窬十手所指驅不勝驅一擲而斃誅不勝誅凡物之最可憎者殆莫過於蠅乎當夫殺

梅餘菴文稿卷二

七

牛歌園藏書

雨初晴薰風欲暑雙翼始生萬頭齊舉擾擾邪謀翁翁細語適從何來爰得我所果無鼻而聞香疑有舌而善咀旣而羣輩若煙亂落如雨緝緝繩繩遽遽栩栩抵隙鑽營憑虛攫取伺垢膩而蝨行慕腥羶而蟻聚掠餘羨於膏腴饜神奇於臭腐雖涕辛而涎鹹卽汗酸而糞苦幾無味之不甘但有茹而靡吐偷精氣於人身信血蟲之爲蠱其或隱字相蒙借書爲市剽松煙之餘香污麥光之佳紙方揚扇以逐之乍操觚而集矣紛一往而一來頓三坐而三起矧夫呼必成盧食皆遺矢玉受點而生瑕衣更新而蒙滓攙雞口而亂四方附驥尾而馳千里縱唾罵之不知極冥頑之無恥甚至吸血嚼脂吮癰吮痔擇肥尤巧於吹毛得竅忽驚其入耳其爲禍也如斯安得聽之而已至於窺炊玉之廚躩垂珠之幌神注射於臺盤跡沿緣於罽網打窗疑撒豆

之聲鑽紙訝煎茶之響漿初壓而私嘗般未登而先享腹瑣瑣以難填足營營而善攘尸居賴餘氣之存肉食竊大烹之養羌如醉以如癡竟非疴而非痒疲揮塵於詩筵誤浮蛆於酒盞半舍則西子顰眉一拍而南膜合掌若乃蟾月斂照蚊雷罷號紗幘未捲玉枕無憐忽娑娑其拂面若輕墜乎一毛又嚶嚶其掠鬢倏旋轉以如縲偶別胎而登鼻旋自頂以循尻失麻姑之仙爪奈背癢而思搔致曲肱之靡定亦揮手之徒勞病者因之骨立勇者爲之膚撓飽雖颺而不遠憤欲捉而潛逃嗟嗟是物也鬼蜮之蹤莫測貪狼之欲難盈以人爲糧則罪無可道於律爲盜則法無可生宜乎擊以王思之劔綑之盧氏之錫快吐棄於坡老怒揮斥於儒衡胡不射之以棘撻之以荆非遠棄於冰山之戍將自陷於湯鑊之烹厥有奇蟲亦名老虎若籠籠形與甍

觥伍號爲飛將軍配以蠕蠕部俾跳盪以立功馘成禽於一鼓翦其翼而聚殲伏其腦而就鹽獻小醜於大庭肆涼州之武舞

序

袁厚安

續懋

同年詩序

昔韓非工立說五蠹六蠹剔敝釐奸揚雄善著書九据三摹鈎深索隱皆古之奇人也奇人不恆有而吾得友之古人不可作而吾得見之豈惟見之友之而已將使後之人知韓非揚雄而後猶有奇人如吾友者非吾言之徵而誰徵乎厚安吾同年友也居同郡仕同官性情學業無不同宜知之最真而言之獨稔也其爲人河目海口高視闊步奇氣英英逼人然而口吃初與人寒澀格格不能吐及襟靈胖合議論鋒發箭機百出足以拄五鹿而吞九牛忽焉懷溫其頤領間若有牽掣之者久之久之

梅餘菴文稿卷三

牛敬開
藏書

斷緒始續又若有拊其背而促之語者不傾寫肝鬲不止蓋其才分絕人性又好勝天故以此靳之也奪齒予角傳翼兩足充於心而紕於口嗇於聲而豐於名於此知造物者之好奇而厚安之奇以吃著方在都時無日不飲無飲不醉無醉不偕醉則戲之曰君能酬我百語明日飲君酒厚安欣然諾乃莊坐正容隨問隨答盡百語無期次日酌之醉則又戲之曰我不賭君百語但四字耳問云何曰韓紅何黑厚安口哆張喉間霍霍如有物面紅眼白半晌不能出一字遂一笑而罷嗚呼此吾輩少年歡劇事情狀猶在目前而厚安已作古人矣是非古人之詩乎讀未終篇浪然淚下不謂厚安之才遂盡於此詩學選體間出入於元白繇於天咫太高不肯漁深獵險往往稱情而作適意而止故未能質絕古人要其致力之淺深與用意之得失厚

安所不及知而吾能知之惟知之最深故言之獨稔也使假之
以年而充之以學其才必不盡於此而竟盡於此矣在厚安撥
巍科完大節不必以詩傳詩不必以序傳而吾之爲是序也誠
以世有奇才惜其不及著書立說與韓非揚雄比重而僅有此
闕冊一卷在也不亦悲夫

梅餘菴文稿卷三

二

半畝園藏書

以乎而心之只其不必不盡於此而竟盡於此矣在厚安撥
巍科完大節不必以詩傳詩不必以序傳而吾之爲是序也誠
以世有奇才惜其不及著書立說與韓非揚雄比重而僅有此
闕冊一卷在也不亦悲夫

李小寶漢印譜序

農者畝田役者壘土劫灰之中漏澤之下有塊者銅或寸者砥
喜色登眉軒然欲儼雖靡識其名而羣歆其古也士大夫夙嗜
奇觚遽捐清俸搜索而徠按掌以弄幾幾乎彝鼎儷珍球圖匹
重既度几以裝褫復盈廷而聚訟有如惡夫著姓蟲達稽名孰
爲懿士孰爲鉅卿真鼎贗鼎東京西京殊叟聞之不定方闢抵
而互爭質刃於指光銜於時益不翅乎金探應社玉挈秦庭誠
以古物則重今物則輕就寥寥之一印已足默測乎世好人情
吾獨怪乎李子辛生糟粕簡冊糠粃功名破桑生之硯刻晏子
之楹饑則舐丹砂之色寒而號鐵筆之靈何其志之僻而藝之
精乎是冊也六書畢貫三篆深研勒陽冰之跡紬滂喜之篇摩
鏡劍之所鑄仿符璽之所鑄急就章兼參其義博古圖歷覽其

悔餘菴文稿卷三

三

牛歌園
藏書

全妙斟肥瘦變錯方圓陽紆陰縵左折右旋信能截曼生之腕
拍穆倩之肩竊比老彭吾無間然勁足破乎五玉貧不名乎一
錢蘄煌煌而照世遂矻矻以窮年吁嗟乎忠孝侯文章守繁何
人不常有惟是助伐鳳毛游談雞口持籌障簾之雄超乘翹關
之耦宜其銀佩腰間金懸肘後乃至卻青衣而繡膺脫絳幘而
冠首亦復文魚緝囊靈犀縮綬粲名號之丹黃紛不知其誰某
胡爲乎沮誦居旨昆吾役手詰曲於蛇書鶴書莊嚴於螭紐獅
紐鳶肩兀兀以據梧猿臂盤盤而生柳若辛生者得不爲牢耶
石耶五鹿客之所醜耶

黃仙樵同年主靜軒文集序

予交仙樵二十年所與晨夕晤對者前後不及百日相知以詩相見必以詩往往一字未安四聲不協口調互礮手按推敲至於冥坐待燈當餐忘筋必得完詩而後已於詩蓋無所不談而初未嘗及古文意其所短也今仙樵沒二年矣其子傳壽見予於豫章出遺文請定之皆余所未嘗見而仙樵固未嘗言也余於古文無師授無家派偶有所作輒以意造不知何者爲法安能定仙樵之文何者爲古文第觀其秀茂之氣溢於行間和粹之聲流於簡外騷騷乎入古作者之林然後知仙樵固不短於此而所長亦遂盡於此此則年爲之也嗚呼安得起仙樵而更與言古文乎

悔餘齋文稿卷三

四

半畝園藏書

吳鈞甫秉衡太守信豐守城記序

論天下事骨飛肉騰肝衡抵掌曰惟我能若戰必克而殘可勝
不折一矢不傷一兵勅敵立踣危城獨嬰姑妄聽之終焉有徵
忽聞風鶴跟肘自紉或牀下伏縮如凍蠅或堂下走颺如饑鷹
或蟻旋磨或魚觸罾衝梯隧穴其解土崩夸詞在耳酷禍旋膺
孰爲時傑坐言起行延陵季子驚人一鳴氣炎如火心潔於冰
自臨爾邑無負斯民利害不計人神所憑瘡區僻陋狂寇侵凌
孤城斗大一蹴可登比室馨懸一食無贏池魚待沸堞雉疑傾
千人一膽前呼後應以戰爲守勇與智并據陴鬢植志定神凝
與氣爲母與福爲兄神漢潛淵藏疏足羹萬命再造百感一誠
礮雷炬日奚隙之乘二百日中般攻翟應起屨立懦後風畢興
礮堡關棧糧鋤棘矜人自爲戰莫之敢攫犬狼野竄鷲鷲威棲

悔餘菴文稿卷三

五

半畝園藏書

天下如是何憂不平胡不馮蘇假以專征神鋒摩厲鋤莽鉞藤
盤根錯節利器宜升一資半級勞重酬輕手此三復汗顏益頽
四旬典郡潛來盜憎紅羊宿劫墨劄哀聲孤憤韓非窮愁虞卿
視茲實效媿我虛名何爲勝算遇變不驚何爲神策眾志成城
心光肆照晦夕傳燈真氣上薄威弧競明

馮子良論太守詩存序

藝不專不足以成名思不壹不足以通神能銳不能堅不足以言志能周不能摯不足以言情山可頽也而不頽者真人之窮水可腐也而不腐者窮人之真惟其真也故能久惟其窮也故能貞知此乃可以解人之詩爲解詩之人予與子良交垂十年矣始相識於章門見其鬚鬢皓白矚目清異肝膽輪囷牙吻鋒厲才則雄也示詩十四卷有觸必鳴無體不備鬪捷萬言爭奇一字氣則盛也尋其真源悟其初地功成於三伐毛道盡於九折臂然後知其摯於情堅於志而詩之存非易也年少登科不志溫飽肆力歌吟束身研討賸百家以自豐破萬卷而猶少薄訓詁而罷攻診聲病而善療其於藝也可謂專矣仕途蹭蹬戎事鞅掌鳴琴雅歌攬轡遐想構意必雙造詞無兩化腐語以

梅餘卷之稿卷三

六

牛畝園藏書

爲奇練啞字而使響其於思也可謂壹矣少陵鋪陳香山諷諭昌黎生硬之詞東坡奇逸之趣摹顰笑於神情攝精魂於字句抱寡絲而獨彈守神鑪而潛鑄甜苦徹於中邊妍醜聽於毀譽其志之堅也如是琴筑唱酬瓊琚投贈相體爲衣寫妝如鏡襍兒女之悲歡極交遊之愛敬致慷慨以閔時習和平於知命敦厚根於詩教激直萌於天性其情之摯也如是僞者必敗真者必傳物誠有之惟詩亦然目偷耳剽塗飾爲妍規規一體病乃拘攣此自斷其天者也若子良之詩則真氣之所醞釀而真意之所盤旋達者易好窮者易醜人則有然惟詩獨否異竅同吟衰揚恐後赫赫一時神乃衰朽此自折其壽者也若子良之詩則窮於境而不窮於思窮於身而不窮於口此固子良之真詩窮而益工者矣詩難於存尤難於解知已一言傳信千載陸雲

之狂笑唐衢之痛哭於詩爲真詩伯喈之賞音公瑾之顧曲於詩爲真解望子雲於後世未若同時付敬禮以定文不如見在此予與子良所爲愉快也而或且以爲標榜也而或且以爲蚩給也嗟乎七帙之年四品之官貧不至絕糧亦不至號寒引宮刻羽調鉛吮丹萃此逸思蔚爲奇觀思斂於壹藝成於專情以真而倍摯志以窮而益堅探喉畢吐脫手旋刊千秋論定以竣蓋棺至於愛者不能助則亦忌者不能殘庶幾五百年之後有此十六卷之完然後知吾輩詩心之不朽而皇天老眼之難瞞也夫

悔餘菴文稿卷三

七

半畝園
藏書

左夫人 錫璣 碧梧紅蕉吟館詩稿序

劉家三妹比傳俳詠之工左氏一門早識分詞之豔輯玉臺新
咏粉印方鮮數錦瑟華年冰弦轉咽苦調忽彈夫寡鵠幽思猶
繞於春蠶雖韻宋璜牙遽撤北宮之環瑱而香融繡口玉摹南
海之鑑鑿此蓋吾亡友袁厚安同年繼室左夫人作也幼嫻姆
教多讀父書絳樹能吟紺華在唾當夫金龜得婿銀鹿弄兒刻
華燭以研思倚熏籠而索句仙人甲帳芸籤排寫韻之樓元日
辛盤椒頌薦迎春之閣雙心一絲纏繇自結襟情萬草千花爨
帖難尋綫跡上風鳴而下風應各暢元音春月喜而秋月愁頻
酬好語信乎影形互贈福慧交修者矣既而司馬倦游芙蓉坐
對修蛾燈損芍藥詞離佩瑱聊足忘憂食藥未嘗言苦寄若蘭
之錦回文巧若璇璣誦徐淑之書好事爭爲什襲固宜椒風儷
跡松雪齋稱夫豈鄰於紅葉寄愁黃花比瘦者耶乃至柔之從
宦伯也執爿劫起紅羊去同黃鶴藁砧何在目斷刀環華表不
歸口銜石闕竹惟有淚桃本無言此則纏結冰懷任春風而不
暖懺除綺語與秋月以皆澄矣惟此一編爲之三嘆繹國風之
旨何疑周姥能詩續女典之篇豈讓班家作誠間氣獨鍾於女
子秀擢荃蘅知音謬附於中郎奇搜桐竹琢玉截金之句果然
道韞多才彈冠結綬之交獨有君甯知狀辨莫邪縵理足徵爪
髮之華索臯甫序言何惜齒牙之論

悔餘菴文集卷三

八

半畝園
世藏書

薛慰農

晴雨

司馬香草閑情詩序

夢裏蘅蕪漢寢之遺香宛在吟邊蘭杜楚騷之幽怨如何飛絮
落花夙有因依之分倡條冶葉新畱護惜之緣是以賦罷蕪城
夢回芝館證果於陳芳之國乞靈於聚窟之山吳質所爲長愁
江淹於馬多恨也茲以德音鸞鷲之才仿崔珣鸞鷲之什當肩
寫翠繪絕豔於唐宮在髻爲釵締深情於陶令三十段明光之
曲挑徹琴心百一篇隱喻之辭撥開豔耳玉溪錦瑟細數華年
金谷瑤觴忽刊陳迹襟上之酒痕已舊壺中之墨汁方新信春
士之思多匪冬郎之體弱固宜浣薔薇而雒誦嗅薔薇以參禪
矣有如名重姚黃品妍歐碧蕊珠絢影茗玉鏘聲小宋偷呼蓬
山更遠前劉復返藥徑旋迷泥油碧之車何處迎來小小漉綵
灰之酒幾時喚起眞眞豈若椒風引笑蘭露猜嘵嘵螺黛於雙

悔餘庵文稿卷三

九

牛歌園
藏書

眉約鴉黃於半額枇杷花下一往情深豈蔻梢頭十分春滿蓉
裳荔帶長開對舞之筵蓀壁蕙楊小拓藏嬌之屋旣乃贈將芍
藥開到茶蘼骨瘦香桃淚斑斑竹黃楊小厄頰頰不聞之年紅
豆叢生歷歷相思之種悵蹏聲之遽遠綠黯裙腰憐唾色之猶
鮮紺凝袖角甚或綠華影謝絳樹歌沈沒綦跡於苔階斂袿熏
於盞篋玉鈎斜畔名叙叙以誰題銀燭光中步姍姍而欲活春
風榆莢猶飛買笑之錢秋月孛蘿虛攝效舉之鏡是則新蕉抽
卷難舒層疊之思斷藕牽絲枉抱纏綿之緒返魂有術筆尖開
押不盧花微笑無言座下契阿那迎葉如僕者在山遠志虛憶
當歸出水夫容翻憐獨活雲拋杖底尋葦撥以何年月墮泥中
訊鞠窮而如昨紅椒合口無語含辛黃蘗生牙有情最苦載繹
瑤華之唱如聆玉樹之歌記前事於紺珠悟後因於金粟迭迷

艾蒨三薰麗正之文茉莉素馨四照華嚴之界蒸成芝菌於斯
詹文字之祥佩當萱蘇足以起幽憂之疾

悔儉菴文稿卷三

十

半畝園
藏書

黃仙樵 秩林 孝廉燕臺吟草序

昔子高好龍而真龍下伯樂相馬而羣馬空以知咸感則思通
知希則道貴其致此者豈偶然哉有如按譜求鷹披圖索駿規
規其似畏憂其難禱祠信日夕之勤物色竟風塵之罕一旦羶
從蟻暴蛇得蛇憐乃嘆朋簪之盡有非太上所詹知襟佩之將
無事蹇修為介合勤勤乎此倡彼和前喁隨于若余與仙樵之
相得者仙樵既輯其主靜軒詩並舟車詩集授梓茲刻其第三
集也自計偕至止洎報罷言旋其間見月思鄉傾風念友今雨
舊雨冠蓋之逢迎大山小山墳箴之往復聯車載酒塔寺蒐奇
畫壁聽歌旗亭賭勝郵筒緘望遠之吟祖帳續思歸之引襟靈
有託篋衍無遺手此一編心焉三嘆嗟嗟秋蟲春鳥不平安得
不鳴月菟陽烏相望偏難相見自昔睽離之會比之冥晤而常

悔餘文集卷三

十一

半放園藏書

多幽苦之音例以懽娛而易好憂患始於識字窮愁得以著書
我則有然君何為者且夫靈分之籍不能盡注奎垣炳蔚之文
不必專研韻府要惟川嶽鍾其清氣金絲發其秘音束髮受書
四聲辨早撚髭索句一字吟安斯則雷雨經綸星雲黼黻蘭若
在握竹柏為心初無事芸版銘勛芝楣旌行而英華露布梗概
煙羅燕雀衡平立分軒輊龍鸞鏡徹畢貢媼姍所絲鎖院程才
以歌吟遜士品輜車問俗以謠諺采民情即謂鍾磬之適句足
裨師曠之揣聲雖賦比興參以三實功德言貫以一也惟然知
詩固不易詩尤不易知哉世所稱才子鄒枚鉅公燕許執詞壇
之牛耳亢墨府之龍頭才繁繁而斗量譽籍籍而鼎重五光十
色態其異萬竅一吟聲則同余有弗敢知知亦弗敢論已獨是
芸生而州處蓬累而旅遊齒序則鴈行肺附則鷗狎上風鳴而

下風應久已神交去日短而來日長況當年少古之人望鼻運斤之喻拍肩把袖之吟以若所言庶乎不媿然則訂雷琴之分寸測烟笛之宮商皇琴折楊異聽獎於里耳台組列錦誠膺服於賦心知仙樵之詩者其有深於余者耶噫嘻於三百篇後纘四始六義之遺卽五七言中拏兩晉三唐之粹三洗髓而爲僊一脫胎而卽聖精心妙理昌谷足以命騷絕跡飛行壽陵不能學步此則納萬派而竝歸裊海何有纖流總八音而獨奏鈞天更無凡嚮息古今人之憾展也國能兼大小雅之材負乎天授將風騷其汝翼無河漢於吾言仙樵努力哉夫結綬彈冠之雅往牒稱難吹笙鼓瑟之娛懽筵能幾在山遠志常千萬以上鄰出谷友聲僅二三之知己往往不諧競病莫與推敲幸而笙磬音同筵鐘響各愛乞僧寮暢襟情於蓮社嬾趨公府陪觴詠於

梅餘菴文稿卷三

十一

半畝園藏書

蘭亭迦陵之鳥相依濠濮之魚亦樂然而秋風忽起吹蓬梗於天涯春水方生漂桃苻於人海離人黯黯愁隨楊柳枝長遠道絲絲望斷萑蒲花發況夫季子百金裝盡只合歸休長卿四壁家徒奈何游倦晝日旣仙毫歛宋望雲更親舍縈懷去也可思畱之不得如仙樵今日者於是出國門而飲餞還從七子賦詩臨岐路以贈言重媿三都索序不辭蚓唱以代驪歌跂予望之嗟予行矣異日萬言試士君來讎東觀之書幾人百拜呼兄我願搢南宮之笏

褚守然

景錫

千戶嘯月軒詩序

昔周處斬蛟射虎折節從二陸學問卒爲名士以忠孝稱高適五十始學爲詩詩最工在唐詩人亦最達少陵贈之詩云海內稱詩伯如公有幾人其推重若此吾不知其爲虛譽耶爲眞賞耶要之有志者則事竟成也班超爲蘭臺令史不樂久事筆硯從征西域卒踐通侯之三子者志同事異及其成也雖異而實同然則士不患無成患無志耳世之有志於詩者夥矣其成者亦指不勝僂大要規矩唐賢出入騷選因其性靈佐以學力少陵所云讀書破萬卷下筆如有神不易之論也自隨園老人持性靈之說示人以淺近穠樸乎閨人卯子幾與騷人爭席此何爲者耶古之人曲高寡和歲暮無徒往往降一格以相從揭一說以相銜依聲附影萬喙一鳴實以此自快而非其眞也有不

悔餘卷文稿卷三

十三

牛飲園
藏書

讀隨園詩者乎擷四部之英綜百家之體縱橫驅使典實紛綸孰是其專主性靈者惟英雄能欺人亦惟英雄能不受人欺耳吾不知褚君詩人也以爲魁梧之材乘時自奮短衣匹馬慷慨從戎殆有志爲班定遠者前年於玉山相見不知其能詩也今以書來附詩索序自稱功業無成而學爲韻語居然成帙以吳下阿蒙爲况獻歲小暇刮目誦之非蠅聲蚓竅之纖無牛鬼蛇神之怪清和順易殊近自然不離性靈者近是使其讀破萬卷下筆有神安知數十年後不與孝侯達夫並稱名士士果有志豈以學之遲蚤限耶杜牧之贈張祜詩云誰人得似張公子千首詩輕萬戶侯信斯言也其視立功萬里生入玉門孰得孰失何去何從褚君其自擇焉可矣

同年張仲昇

鐘彥太守詩序

修詞與意言景及情四美不完萬言猶癢非賈精墳典則意贍而詞拘非借助山川則情長而景略其兼此者蓋亦難之仲昇同年和鬯心聲平亭肉好蔚然大著綽有前徽樊川儷其襪禮玉局規其醕肆上攀金粟下躡鐵厓信天咫之獨豐靡俗氛之侵染奪胎入聖擯獺祭之工著手成春掩鯨鏗之麗良以鄴侯三萬軸牙籤闡秘於山扃黎母九千程珊瑚効珍於海藏既練功於雒誦復綴跡於齊煙宜其手點丹鉛胸函金碧詎止浮沔湘探禹穴快太史之游觀信能抉雲漢分天章偉昌黎之才調自然香色豈鼻偷眼剽以爲儲別有精神非腦滿腸肥所能造由此熟精文選奴僕離騷犀足駭雞蠅思附驥南州見雪自然俗目皆驚東野從雲敢不低頭下拜

悔餘菴文稿卷三

丙

半敬園藏書

悔餘菴文稿卷三終

